

古湘芹先生逝世紀念專刊

漢氏題



中華民國二十二年十月廿八日

中國國民黨中央執行委員會西南執行部印



湘芹古公事畧

公諱應芬字湘芹其先籍隸廣東梅縣後徙廣州居番禺遂爲番禺人公幼而穎異治經史詞章宿學稱之歸安朱彊邨按臨試經古置第一游邑庠旋食廩餼民國紀元前八年學於日本東京法政大學法政速成科會中國同盟會成立於是遂加盟致力革命時紀元前七年也既畢業歸爲廣東法政學堂編纂廣東諮議局成立爲書記長番禺縣令楊恕祺以非刑刑某女子議員糾舉之並可決禁賭案公與有力焉民國元年爲廣東都督府核計院長既瓊崖民軍叛變以公爲瓊崖綏靖處總辦平之歸爲都督府秘書二年討袁義師起與胡漢民朱執信應之師敗中華革命軍興

乃往來於馬來半島香港澳門間任籌餉聯絡事嘗與執信謀以永固商輪劫肇和軍艦藉攻廣州弗濟如滬踰年而有護法之役總理將率海軍南下命公先以護法之旨宣示粵中將吏陳炯焜朱慶瀾等參衆兩院乃開非常國會於廣州選總理爲大元帥命陳炯明率粵軍援閩餉械不繼止于漳州粵督軍莫榮新復謀通敵公將命如漳州以大義責陳旋師師還逐莫以陳爲廣東省省長公爲政務廳廳長非常國會復開於廣州選總理爲大總統督師北伐出廣西師次桂林陳炯明靳不接濟乃決旋師改道至蒼梧召陳將解決後方供給事公力促陳往將發矣有尼之者卒不行公乃離職去方有事於滬聞六月十六日之變亟歸謁

總理於黃埔永豐艦佐治軍書達旦不休居數月 總理乃命公如香港籌餉接濟各地討陳軍遂與鄧澤如諸同志謀結合滇桂粵各軍東下討陳陳潰奔惠州桂軍沈鴻英進據廣州陰有異圖江防會議之變省長胡漢民幾遇害旋之港謀於公公立赴江門集粵中陸海各軍以備變 總理乃任命公爲大本營駐江辦事處全權主任及沈鴻英叛公率師敗之於三水既會攻叛軍沈榮光張希棻部於西江又敗之叛軍既平爲大本營行營秘書長隨 總理督師討陳於東江駐石龍石灘等處命公察視陣地師潰軍車沿鐵道倒駛誤衝座車車逆行不能止公未及登徒步至新塘雜軍車中還 總理以爲公已及於難矣公抵家足盡瘡委

頓不能起 總理數致問公怡然若無所苦也十三年 總理督師北伐次韶州公出爲大本營財政部部長兼廣東財政廳廳長時東江南路盡陷於敵省會及西北諸邑防軍侵占稅收府庫爲空公苦心籌畫供億不絕 總理既逝滇桂楊劉叛變公與代行大元帥職權胡漢民密謀赴東江召討陳各軍還師討叛平之十四年國民政府成立以公爲委員兼廣東省政府委員民政廳廳長共產黨既竊黨權嗾使地方椎埋游惰冒農會橫行鄉曲荼毒士民倡言共產有司不能制公患之乃設課吏館警官學校務養成通達治理暢曉黨義之士使爲地方官吏領導民衆奉行主義以弭赤禍十五年一月第二次全國代表大會公當選中央監察

委員會委員受命之贛湘鄂勞軍既歸共產黨攘據黨權勢益熾十六年三月公越嶺如贛會蔣中正於九江謀清黨也蔣未決公持之堅乃如滬與鄧澤如張靜江吳稚暉謀議遂定乃還粵于是有四月十六日清黨之役國民政府定都南京公仍爲委員及財政部部長翌年公之日本歐美考察政治歸如京爲中央政治會議委員國民政府文官長十八年三月第三次全國代表大會公仍當選中央監察委員會委員中央政治會議委員居京二年政治軍事多所獻替而不能如其志屢辭文官長職不獲二十年一月背瘤疾發引病歸初蔣中正執政憑藉權勢專欲獨裁誅鋤異己不遺餘力旋且毀滅法紀拘禁中央執行委員國民政府委員

立法院院長胡漢民於湯山公與中央監察委員鄧澤如蕭佛成林森聯名劾之不報於是中央執監委員非常會議開於廣州組國民政府以公爲常務委員既蔣氏悔禍和平統一會議開于滬派代表赴之公以牙疾不克行十月二十八日薨于位春秋五十有九公爲人誠懇端厚與人交無疾言厲色而論列黨國大計則必力持正義凜然若不可犯事親孝居介南公之喪每語人曰吾五歲而喪母今越五十年並吾父而不可見矣語已輒泣然少與史堅如如兄弟執信游交最深恒討論革命堅如殉難嗒然爲之絕酬應者逾年與執信共患難尤久執信殉難撫其孤如所出嘗於其宅闢一門互通往來爲一家然歷要職用人必先同志其私

親往往不及也生平無私蓄調恤窮乏輒盡其所有雖稱貸不少
悵疾革時自傾其囊得鈔票四百五十圓舉以授其夫人曰吾父
同懷惟一姑在老矣常思有所遺今以授若爲我益足五百圓之
數以與之臥疾猶以外交情形和議問題屢詢左右侍疾者瀕危
之日仍索閱報紙神明不衰遺囑於黨國危機殷殷致慮焉事聞
國府震悼明令褒揚給治喪費一萬圓派員治喪國葬如儀生平
著作多散佚存者有雙梧桐館詩文集凡若干卷 大元帥東征
日記一卷

按公生平事實倉卒間搜集不全謹記其畧如左

國府委員古公治喪處謹述

國民政府委員古公之碑

公諱應芬字湘芹其先籍廣東梅縣後徙廣州曾祖諱佳寧始占籍番禺祖諱定楊以武功授千總擢守備考諱祖祺公幼而穎異治經史詞章宿學稱之歸安朱彊邨按臨試經古置第一游邑庠旋食廩餼學於日本東京法政大學法政速成科會中國同盟會成立遂加盟致力革命時紀元前七年也民國元年爲廣東都督府核計院長既瓊崖民軍叛變以公爲瓊崖綏靖處總辦平之歸爲都督府秘書二年討袁義師起公與朱執信胡漢民於滬商應援師敗總理創立中華革命黨再謀討賊乃奔走馬來半島香港澳門間任籌餉聯絡事六年護法之役總理命公先以護法

之旨宣示粵中將吏參衆兩院乃開非常國會於廣州選總理
爲大元帥命陳炯明率粵軍援閩餉械不繼止於漳州粵督軍莫
榮新復謀通敵公將命如漳州以大義責陳旋師師還逐莫以陳
爲廣東省長公爲政務廳長非常國會復開於廣州選總理爲
大總統督師北伐出廣西師次桂林陳炯明抗命阻師乃決旋師
改道至蒼梧召陳將解決後方供給事公力促陳往不聽公乃離
職去滬聞六月十六日之變亟歸謁總理於永豐艦佐治軍書
達旦不休居數日總理乃命公如香港籌餉接濟各地討陳軍
遂與鄧澤如諸同志謀結合滇桂粵各軍東下討陳潰奔惠州桂
軍沈鴻英進據廣州陰有異圖江防會議之變漢民幾遇害旋之

港謀於公公立赴江門集粵中海陸各軍以備變 總理乃任命公爲大本營駐江辦事處全權主任及沈鴻英叛公率師敗之於三水旋會攻叛軍沈榮光張希栻部於西江又敗之叛軍平爲大本營行營秘書長隨 總理督師討陳於東江十三年 總理督師北伐次韶州公出爲大本營財政部長兼廣東財政廳長時東江南路盡陷於敵省會及西北諸邑防軍侵占稅收府庫爲空公苦心籌畫供億不絕 總理既逝滇楊桂劉叛變時漢民代行大元帥職權公與漢民密謀赴東江召討陳各軍還師討叛平之十四年國民政府成立以公爲委員兼廣東省政府委員民政廳長十五年一月第二次全國代表大會公當選中央監察委員會委

員受命之贛湘鄂勞軍既歸共產黨攘據黨權勢日熾十六年三月公越嶺如贛會蔣中正於九江謀清黨蔣未決公持之堅乃如滬與鄧澤如張靜江吳稚暉謀議遂定乃還粵於是有四月十六日清黨之役國民政府定都南京公仍爲委員及財政部長翌年公之日本歐美考察政治歸如京爲中央委員政治會議委員國民政府文官長十八年三月第三次全國代表大會公仍當選中央監察委員會委員中央政治會議委員居京二年政治軍事多所獻替而不能如其志屢辭文官長不獲二十年一月背瘤疾發引病歸初蔣中正執政憑藉權勢專欲獨裁毀滅法紀誅鋤異己尤不遺餘力二月十八日拘漢民于湯山公與中央監察委員鄧

澤如蕭佛成林森聯名劾之不報於是中央執監委員非常會議
開于廣州組國民政府以公爲常務委員既而和平統一會議開
于滬派代表赴之公以牙疾不克行十二月十八日薨于位春秋
五十九公爲人厚重寡言平居與人無爭而臨大事則不可奪勇
於行義成敗利鈍非所顧蓋以魯子敬之長厚而爲諸葛孔明之
盡瘁故屢舉大事爲人所不能爲而天下益奇重之十六年八月
南京政變粵中紙幣擠落軍政當局既決維持之策執行厲甚商
人頗苦其擾公時長財政且在粵意雖弗善而不能梗衆議以是
商人咸歸怨于公公九月辭職赴滬然終身未嘗自明也其用人
必先同志私親往往不及生平無私蓄調恤窮乏輒盡其所有雖

稱貸不少恹疾革時自傾囊得鈔票四百五十元舉而授其夫人曰吾父同懷惟一姑在老矣常思有所遺今以授若爲我益足五百元之數以與之臥疾猶以外交情形和議問題屢詢左右侍疾者瀕危之日索閱報紙神明不衰遺囑于黨國危機殷殷致慮焉事聞國府震悼明令褒揚給治喪費一萬圓派員治喪是歲十一月二十九日窆於白山村銀牛尾岡之原國葬如儀

中華民國二十一年十二月七日

附國民政府指令 第七七〇號

令國府委員古公治喪處

據呈請頒發古故委員應芬墓碑文由

據呈已悉故委員德美璠璣勳隆柱石旣崇飾終之典宜有封墓之文據序謨烈毋戾於至公昭紀鴻懿要歸於實錄庶幾山河帶礪陵谷馨香撫安道之遺鐫認康成之塋兆合將碑文令發仰徵良匠式鏤貞珉於戲稽落勳名世壽蒸然之石襄陽憑吊淚零羊祜之碑昭示來茲永垂不朽此令

二十年十二月七日

古湘芹先生事軼

劍公

古湘芹先生逝世，於今又屆兩週年。黨部同志徵文於余，余愧無以應；蓋古先生之學行動業，既歷經黨國先進海內碩彥之敘述，已彰彰在人耳目，固無待小子之贅陳。茲於感傷之餘，就見聞所及，謹述先生生平軼事數則，以見先生應事之有度，與待人之溫厚，在在足資我人效法也。

空城計

民國二十年春間，先生任大本營駐江辦事處全權主任，時沈鴻英稱兵變叛，先生集粵中陸海各軍敗之於三水，既又敗沈將沈榮光，張希斌兩軍於西江。先生乃進駐肇慶，居中策畫軍事，沈部退都城，聚衆謀反攻，傾全部來犯，鄭潤琦退守六步，當時肇慶各軍盡開前綫，肇慶空虛，幕僚中有知都城下有一小路，可偷襲包抄肇慶者，苟敵

從此來，則肇兵少難支，深爲憂懼，但先生以敵不悉我軍虛實，未熟地理形勢，必不敢從此來，遂鎮靜如故，祇派縣兵百餘，在小路佈疑陣，一面指揮大隊應戰，卒將敵殲潰，而沈軍亦一蹶不復振矣。昔諸葛曾以空城而退司馬懿兵，談者神之，蓋將兵者，知彼知己，雖居虎口之險，而實如泰山之安也。

紅米飯

先生任大本營駐江辦事處全權主任時，既率軍討沈鴻英，節節勝利，乃進駐肇慶，以便就近指揮，時籌餉困難，軍費甚絀，幾至無隔宿之糧，雖所食亦米類中之最劣而末去糠者，所謂紅米是也。時自先生以至士卒，俱一律食此，無有殊別。屬僚食不下咽而先生甘之如飴，數日後副官某，以紅米糙劣，乃在先生席易白米飯以進，先生即召某副官責之，使不必如是，蓋與士卒同甘苦也。

西江墮水

先生於討沈鴻英之役，師次肇慶，以端州旅館爲辦事處，某日乘座駕艦往巡視，適